

AKASHVANI AIZAWL

REGIONAL NEWS BULLETIN

HEADLINES (EVENING)

- 1. Larsap General (Retd) Vijay Kumar Singh hovin vawiin khan Raj Bhavan-ah Jammu and Kashmir, Ladakh, Andra Pradesh, Andaman and Nicobar Islands, Chandigarh leh Chhattisgarh-te dinchamphaphak lawm a ni.
- 2. Dampa Assembly bial by-election atana party hrang hrang vote zawn hna chu ngawrh taka beih chhoh mek a ni.
- 3. Prime Minister Narendra Modia chuan zaninah Gujarat-a Ekta nagar atangin hmasawna hna cheng vaibelchhe 1140 chuang hu a hawng dawn.
- 4. Defence Minister Rajnath Singh-a chuan ni hnih cham turin vawiin khan Malaysia khawpui Kuala Lumpur a pan.



GOVERNOR

Larsap General (Retd) Vijay Kumar Singh hovin vawiin khan Raj Bhavan-ah Jammu and Kashmir, Ladakh, Andra Pradesh, Andaman and Nicobar Islands, Chandigarh leh Chhattisgarh-te dinchamphaphak lawm a ni.

Ek Bharat Shreshtha Bharat hmalakna hnuaia Durbar Hall-a state leh UT 6-te dinchamphaphak 'Foundation Day' lawmnaah hian Larsap General (Dr) Vijay Kumar Singh chuan thu sawiin, India ram inpumkhatna atana Prime Minister hmalaknaa programme pawimawh tak 'Ek Bharat Shreshtha Bharat' hmangin India ram khawi hmunah pawh hnam ziarang leh nunphungte inpawh tlang taka pholanna 'Mini India' siam thin a ni a ti a, Foundation Day lawm sak State leh Union Territory-te chanchin tlangpui tarlangin, Mizoram ang bawka hmun mawi leh ami chengte pawh mi tha tak tak an nih thu a sawi a. India ram anga hnam ziarang leh nunphung danglam nasa ram a awm chuan loh thu leh State/UT tinin hnam ziarang leh tihdan phung hran theuh an neih thu sawiin, India ram intodelh leh hmasawn 'Vikshit Bharat' siam turin lungual taka kan thawhho tlan a tul a ni, a ti a. Kalkhawmte chu State dangte hnam ziarang, nunphung, tawng leh inkaihhruainate hriat chian lehzual tum turin a chah a ni.

Byte: Governor

Ek Bharat Shreshtha Bharat programme kaltlang hian India rama State leh UT hrang hrangte dinchamphaphak Foundation Day lawmna chu Mizorama Raj Bhavan-ah Governor kaihhruaiin June, 2023 atang khan buatsaih tan a ni.



UNITY RUN

National Unity Day (Rashtriya Ekta Diwas) pualin naktuk hian Unity Run neih tur a ni a, tum ber chu mipuite hnena inpumkhatna leh taksa sawizawi chawilar a ni a tih SAI Director Pu Lianminthang chuan a sawi.

Akashvani Aizawl zawhna chhangin, Sports Authority of India (SAI) Director Pu Lianminthang chuan India Deputy Prime Minister hmasa ber Sardar Vallabhbhai Patel pianchampha vawi 150-na puala naktuka ram puma National Unity Day (Rashtriya Ekta Diwas) hman turah SAI leh Sports & Youth Services tangkawp chuan Unity Day Run a buatsaih dawn a, Sports Department Director Pu H. Lalhmingthanga chuan zing dar 6 leh minute 15-ah Unity Run-a tlan tur te chu Sikulpuikawnah a vailiam dawn a, Upper Khatlaah tlanin, Assembly House thleng an tlan ang a, heta tang hian an let leh dawn a ti a, Lunglei leh Thenzawlah pawh Unity Run hi neih a nih tur thu a sawi bawk a ni.

SAI Director chuan he Unity Day Run hi Fit India Run hmalakna kalzel a ni tel bawk tih sawiin, a tum ber chu mipuite hnena inpumkhatna leh taksa hrisel nei tura insawizawi chawilar a ni a ti a, India inpumkhat chu a pawimawh hle tih sawiin, state leh ram te a chak dawn a ti a, fitness run a nih bawk avangin taksa hriselna atan a pawimawh a, mipuite chu an nitin nunah taksa sawizawi leh tlan te uar a, thil chin than a nei turin a chah a ni.



DAMPA CAMPAIGN

Dampa bial by-election atana campaign a lo zin Union Minister of state Jitendra Singh-a'n Prime Minister Narendra Modi-a kaihhruai sorkar chuan hmarchhak bial chu a ngaihtuah hle a ti.

Pu Singh hian vawiin khan Silsuri Playground-a public meeting a neih a, tun tuma a rawn zin chhan hi Dampa bial by-election lo awm tur vang chauh ni lovin, kum 2028 Assembly inthlanpui atan pawh a ni a ti a, BJP sorkarna state ah te chuan hmasawнна nasa takin a kal mek tih sawiin, Silisuri chu international border hnaiha awm a nih angin Highway in a kaltlang a ngai a ti a, hetiang a hmala thei tur BJP chu thlawp theuh turin Silisuri mipuite a sawm a, Prime Minister Narendra Modi-a kaihhruai sorkar chuan hmarchhak bial chu a ngaihtuah hle tih a sawi bawk a ni.

Byte: Union Minister of state Jitendra Singh

Union Minister of state Jitendra Singh hi BJP Mizoram President, Dr K. Beichhua, MLA , Pu K. Hrahmo, MLA, Dampa bial by-election lo awm tura BJP Official Candidate Pu Lalhmingthanga leh BJP hruiatu dangte bakah Tripura BJP MLA pahnih Pramod Reang leh Santana Chakma ten an tawiawm a.

He hunah hian BJP Official Candidate Pu Lalhmingthanga pawhin thu sawiin, Dampa Bial mi ngei a nih angin an bial mamawh hrang hrang hretu leh hmutu a ni a inti a, an harsatna sutkian a nih theih nan Central hruiatu ten hmalak pui

an tiam thu leh Bial hnufual an nihna atanga khai chhuak turin hma a la nghal dawn tih sawiin, chutianga hmasawnna kawng an zawh theih nan Bial mipuite chu amah vote theuh turin a ngen a ni.

Dampa biala MNF official candidate Dr. R. Lalthangliana pawhin vawiin hian Hruiduk, Pukzing Vengthar, Hnahva leh Silsuri a tlawh a. Thusawiin, ZPM-in Dampa bial by-election a an auhla leh mipui an vehthlemna ber Chief Minister Special Package cheng nuai khat pek tih leh hand holding policy chu mipui tan inghahna tlak a ni lo a ti a, kum hnih dawn ZPM Sorkarah hian Dampa bial Silsuri-ah pakhat chauh la pek a ni a. Hemi atan hian sum pek tur Sorkarin an nei lo a ti.

Hand Holding Scheme-a Loan an aupui pawh chu mirethei zawkte dawmkanna tur ni lovin, rulh leh ngei ngei ngai, pawisa pung tam tak nena leiba insiamna mai mai a ni thei a ti a. Mi sing chuangin he loan hi an dil tawh laiin Bank chuan mi 200 vel chauh loan an la pe thei a, ZPM Sorkarin a thlanchhuah mi 700 chuang atangin mi 100 chuang zet chu bank hrang hrangin an lo hnawl tawh bawk tih sawiin; Sorkarin a nawrna avangin Bank Institution tlem zawkin loan hi an pe hram hram a, loan tha mi anga an zawrh mek hi inbumna mai a ni a ti.

Dampa bial chung khaw hrang hrang fang mek Congress Candidate Pu John Rotluangliana chu MPCC President Pu Lal Thanzara hruaitu dang ten Marpara, Pukzing Vengthar, Lenbuang Hnahva leh Silsury te an tlawh a, MPCC President Pu Lal Thanzara chuan tun By Election-ah Pu John Rotluangliana a tlin chuan chiang takin kum 2028-ah Congress a sorkar leh dawn tih nemnghehna a ni ang a ti a, NLUP changtlung zawk hmangin Mizoram chhungkaw tin huapzo Policy an kal pui leh dawn tih sawiin enchain chaka tuihal enchainute khan ZPM sorkarin an beisei a phak loh em avangin sorkar an ninzia chui an titi lian ber leh an thunawn a ni tawh a ti a, a bikin Aizawl khawpui mipui, sorkar hnathawk te-ah a nasa zual a ti.

Congress Candidate Pu John Rotluangliana chuan Dampa bial atang in Congress sorkar thar hmel an lantir dawn a ti a, ZPM sorkar thiltih dan duh lohna hi Dampa bial mipuiin Vote hmangin an Protest dawn a ni, a ti.

<><><>

GST REFORMS

Goods & Services Tax GST dan thar hnuaia thil man a tlakhniam avangin mipui ten thil lei an phur a, an bungraw zawrh te pawh an hralh tha sawt niin sumdawng thenkhatin an sawi.

Akashvani Aizawl zawhna chhangin Zote Toyota sales manager Andrew Lalruatkima chuan September ni 22 atanga a taka GST dan thar hman hnuaa Toyota motor man te chu a tlahniam vek tih sawiin, lirthei an neih zinga man tlahniam nasa ber chu Toyota Land Cruiser 300 niin, nuai 16, sang 6, 700 in a man a tlahniam a ti a, thil man tlahniam chu a hralhtu leh a leitute tan thil phurawm tak a ni tih sawiin, sorkar laipuiin GST a siamtha chu lawmawm a ti hle tih thu leh lirthei lei tum pawh an pun chhoh ngei a beisei thu sawi a ni.

Byte: Zote Toyota sales manager Andrew Lalruatkima

Zote Toyota sales manager chuan kumtinin fur lai chu lirthei hralh chhuah a har lai ber a ni tih sawiin, tun thla kal mek, October thla atanga December thla inkar te chu sakhaw hrang hrang kutpui hunlai a nih angin lirthei hralh chhuah tam hunlai a ni tih a sawi bawk a ni.

<><><>

CHHINGCHHIP PROCESSING UNIT

Chhingchhip MIFCO Complex-a Ropuiliani Women Farmer Producer Company Ltd ten Primary Processing Plant an bun thar chu vawiin khan Rural Development & Administration changtu Minister Prof.Lalnilawma’n a hawng.

Prof.Lalnilawma chuan MIFCO-in Chhingchhipa an hmunah Ropuiliani WFCL-te thlai thar sawngbawlna tur khawl bunna tur hmun an pe chu lawmawm a tih thu sawiin SHG nuho leh kuthnathawktute tan a tangkai hle dawn a ni, a ti. Khuallian chuan market linkage chungchangah kan thlai thar te state pawna hralhchhuak thei turin quality tha a pawimawh, a ti a. Tuna khawl thar bun tak hian thlai thar, a bik takin sawhthing, hmarcha leh aieng hralh kawngah a hlutna a tisang hle dawn a ni, a ti. Reliance Mumbai te nen inremna thuthlung an ziah chungchangah Prof Lalnilawma chuan thlawhnaa thlai thar thawncchhuah a ngaih thin avangin a senso a sang a. Tunah chuan tlawm zawka thawn theihna turin Mizoram Train service a neih tak avangin chhunzawm an tum thu a sawi bawk.

Mizoram State Rural Livelihood Mission (MzSRLM) hnuaiah Mahila Kisan Sadhaktikaran Pariyojana Project kaltlangin Ropuiliani Women Farmer Company Ltd hi kum 2020 khan din a ni a. COVID hripui leng vangin harsatna an tawh hnua 2023 atang khan chak zawkin hma an la chho a. District 7 ah Rural Development Block 16, khua 154 tuam chhuakin member 5335 an nei mek a ni. Ropuiliani Producer Company a share holder te tharchhuah sawhthing, Mizo hmarcha leh aieng te man man zawka lei sakin, a hlutna tipung tura sawngbawl a nih hnua an hralh chhuah leh thin a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PM

Prime Minister Narendra Modia chuan zaninah Gujarat-a Ekta nagar atangin hmasawwna hna cheng vaibelchhe 1140 chuang hu a hawng dawn a. Hei bakah hian Pu Modia hian e-bus 25 a vailiam dawn bawk a ni. Naktukah Prime Minister Modia hian Sardar Vallabhai Patel-a puala hriatrengna hun Statue of unity ah a hmang dawn a. Rashtriya Ekta Diwas lawmna peng pakhatat Sardar Patel-a piancham vawi 150 lawmna hun hman a ni ang.

<><><>

UNION HM

Union Home Minister Amit Shah-a chuan naktuk National Unity Day pualin Prime Minister Narendra Modia chaun Kevadiya atangin Unity Parade a hawng dawn tih a sawi. Pu Shaha chuan Unity Parade hi kumtin October ni 31 ah neih ziah tur anih thu a sawi a. Kumtina Republic Day Parade neih thin anga kalpui a ni ang a ti bawk. Hei bakah hian Pu Shaha chuan November ni 1 atanga November ni 15 thleng Bharat Parv hman a ni ang a ti bawk.



DEFENCE MINISTER

Defence Minister Rajnath Singh-a chuan ni hnih cham turin vawiin khan Malaysia khawpui Kuala Lumpur a pan a. A cham chhungin ASEAN Defence Ministers' Meeting-Plus Vawi 12 naah a tel ang. Hei bakah hian Defence Minister hian ramdang hrauitute nen India nena an thawhhona hrang hrangte a sawipui dawn a. Tun tuma ASEAN Defence Ministers' Meeting hian ram venhimna lama India leh ASEAN thawhdunna a tihlen bakah India-in Act East Policy a kalpui mek ti chak lehzual tur anih thu Defence Ministry chuan a puang.

